qual con la sua compagnia di homeni d'arme . . . a la liziera, di hordine dil capitanio zeneral, in questi zorni cavalcoe li per far lo effecto di Gradisca. Et scrive tutto era in hordine, e si aviavano per esser la note al loco et far l'effecto, videlicet con scale robarla etc.; tamen dentro è cavali 200 et 200 fanti. Di fanti 300 nostri fo mandati con Antonio da Castello, quali, si ha, erano zonti in Caorle, nulla loro di Udene intendeno; sichè si farà questa factione senza di loro.

Di domino Hironimo Savorgnan fo letere, da Udene, di 14. Come è lì e il tutto è in ordine con zente dil paexe assa'; sichè si stagi di bona voia. Spera seguirà il disiato efecto.

A di 17, Zuoba, fo il zorno di la Sensa. La Signoria andò col Bucintoro fuora di Do castelli a sposar il mar: vicedoxe sier Piero Lion el consier, e tutti quelli ho nominato eri, che fono a vesporo. Il Principe restò in palazo e fo in Colegio con li Savii, et poi andò in sala a disnar con tutti li convidati al pranso, justa il consueto. Eravi l'orator di Ferara apresso il vicedoxe et il figlio natural dil re di Polana; poi lo episcopo di Brexa, da cha' Zane, et domino Paris Scoto, et il commesso di la religion di Rodi domino Paulo da Cremona, et Zuan Paulo Manfron condutier nostro, e disnono col Principe.

Di Friul, fo letere, a terza, di sier Lunardo Emo luogotenente, di 15, hore . . . Come, hessendo andate le zente nostre con il signor Malatesta Baion et domino Hironimo Savorgnan et aviate verso Gradischa, nostri è stà sentiti, adeo è ritornati re infecta: sicome el ditto Hironimo scrive etc.

Di domino Hironimo Savorgnan, da Udene, a dì 15, hore . . . . Come, hessendo eri partito di Udene con domino Malatesta Bajon con la sua compagnia di zente d'arme et Thedaro dal Borgo con li balestrieri a cavalo, e zonti li fanti soto Antonio da Castello e aviati verso Gradisca, ch'è mia . . . . lontano, trovò quelui menava la pratica, et cussì zonti mia 2 lontano, fece aspetar dito Malatesta con le zente, et aviato esso Antonio da Castello con li fanti, archibusieri prima e guastadori, e scale e quello avanti, qual pareva perso, et sentiteno trar tre schiopi; pur andono di longo e con le scale fino in le fosse, dove uditeno i nimici erano a la guarda et in piedi, quali zà haveano sentiti nostri et cridavano : « Arme, » et deteno li schiopi per aver socorso di Gorizia; de che nostri lassono le scale. Li guastadori e archibusieri butono li archibusi in terra per fuzer via, ma sopravene Malatesta Baion con 10 cavali, qual fe' far alto, dicendo: « Che paura havete? », e li fanti feno alto e recuperono le artelarie, e cussi sono ritornati in Udene, e pur è stà . . . . . Serive tutto era in hordine si non fosseno stà sentiti, et andono a hore 4. Lauda molto il Baion ; che se lui non era, nostri si meteano in fuga. Etiam quel Antonio da Castello supra modo, che merita la gratia di la Signoria nostra, perchè andava a la impresa con gran vigoria et ben ordinava li fanti; sichè in quel zorno ritornorono tutte le zente in Udene.

È da saper, questa pratica fo menata per sier Lunardo Emo luogotenente di la Patria, et scrito a la Signoria, et mandato l'homo qui voleva rubar Gradisca, dicendo li boemi e altri alemani è dentro fanno la guarda fino a hore 3 di note, poi dormeno; unde etiam fo comunichato col capitanio zeneral, qual senti la impresa, e cussì il capitanio di le fantarie, e per termination fata nel Consejo di X con la zonta fu tolta, et è mal reusita.

Da poi disnar, fo, poi vesporo, Colegio di Savii, quali lesseno le soprascrite letere et steteno a consultar un poco.

È da saper, eri, sier Alvise Bafo Cao di XL andò provedador a Cividal di Friul, et fo cavato Cao a la banca di sora, in loco suo, sier Zuan Batista Memo gu. sier Francesco.

Ancora eri, a hora di vesporo, li nodari di Veniexia, quali hanno fato un colegio tra loro, sono fin qui numero . . . , et hanno fato tre soi priori, sono venuti a oferir a la chiexia di San Marco un candeloto di lire . . . di zera bianca, per uno; che fo bel veder, nè più è stà fato; è cosa nova, però ho voluto qui farne nota.

Fo etiam eri posto il San Marco e l'arma Loredana del Doxe nostro a la Scala va in Palazo, qual il coverto è stà refato sotto questo Doxe zà do anni; et cussi mancando in cao di compir, eri fo compita.

In questo zorno, vidi mascare con trombe e pifari e ben vestidi balar sul ponte di piera di San Lio molti baleti; erano tre da homo e tre da donna con vestiti d'oro. Questa nota fazo, perchè più di tal di si è stravestito.

A dì 18. Vene in Colegio il capitanio di le fan- 126 tarie venute questa note di Padoa, et disse : « Serenissimo Principe! Io non so dir cussì in publico quello mi acade; ma Vostra Serenità mi dagi do auditori, con i quali possi conferir quanto ho da dir. » E cussi fo mandato con lui di sopra, dove si reduceva il Colegio, sier Polo Capello el cavalier savio dil Consejo, e sier Piero Trun savio a terra ferma. Et cussi exposto quello voleva, dito capitanio si parti, et fo mandato per li Cai di X, quali referiteno essi